

DOMINGO 22 ORDINARIO CICLO B

PRIMEIRA Dt 4, 1-2. 6-8

Non engadades nada á palabra que vos falo... cumpride os mandamentos do Señor

PROCLAMACIÓN DA PALABRA RECOLLIDA NO LIBRO DO DEUTERONOMIO

Faloulle Moisés ao pobo dicindo:

E agora, Israel, escoita as leis e decretos que eu vos ensino a cumprir para que vivades, entredes e tomedes posesión da terra que o Señor, Deus dos vossos pais, vos entrega. Non engadades nada ás palabras dos mandamentos que eu vos ordeno, nin lles quitedes nada, cumprindo as ordes do Señor, o voso Deus, que eu vos impoño.

Observádeos e poñédeos en práctica, pois isto será a vosa pericia e a vosa sabedoría aos ollos dos pobos. Estes, ao escoitaren todos estes mandamentos, dirán: esta gran nación é o pobo máis experto e máis sabio, pois, que gran nación ten os seus deuses tan cerca de si como está o Señor, noso Deus, sempre que o invocamos? E que gran nación ten mandamentos e preceptos tan xustos coma esta lei que hoxe eu vos propoño?

SALMO RESPONSORIAL Sal 14, 2-3a. 3cd-4ab. 5

R/ (1a): Quen, Señor, se hospedará na túa tenda?

Aquel que anda rectamente e practica a xustiza:
que ten sinceridade no corazón
e non calumnia coa súa lingua;

o que non lle fai mal ao veciño
e non difama ao seu próximo;
o que estima desprezable ao malvado
e apreza aos que temen ao Señor;

o que non presta con usura o seu diñeiro
e non se deixa subornar contra o inocente.
Quen así se comporte,
endexamais non perecerá.

SEGUNDA Sant 1, 17-18. 21b-22. 27

Cumpride a palabra

PROCLAMACIÓN DA PALABRA RECOLLIDA NA CARTA DE SANTIAGO APÓSTOLO

Benqueridos irmáns e irmás:

Todo bo regalo e toda dádiva perfecta vén de arriba, do Pai dos luceiros, en quen nin hai cambios nin tempos de sombras. Pola súa vontade tróuxonos á vida coa palabra da verdade, para que fosemos como as primicias das súas criaturas.

Acollede docilmente a Palabra enxertada en vós, que pode salvar as vosas vidas. Sede cumpridores da Palabra e non vos contentedes con escoitala xustificándovos con razóns enganosas.

A relixión limpa e sen lixo ningún aos ollos de Deus Pai é esta: mirar polos orfos e polas viúvas nas súas coitas e gardarse da contaminación deste mundo.

ALELUIA Sant 1, 18:

Libremente enxendrounos o Pai por medio da palabra da verdade para sermos primicias da súa creación

DOMINGO 22 ORDINARIO CICLO B

EVANXEO Mc 7, 1-8. 14-15. 21-23

Rexeitades os mandados de Deus e agarrádesvos ás tradicións dos homes.

PROCLAMACIÓN DO SANTO EVANXEO SEGUNDO MARCOS

Reuníronse con Xesús un grupo de fariseos con algúns letrados chegados de Xerusalén, e viron aos discípulos comer con mans impuras, é dicir, sen antes lavaren as mans. (É sabido que os fariseos e os xudeus todos non comen sen lavaren ben as mans, seguindo así as vellas tradicións; e cando chegan da rúa, tampouco comen sen se bañaren antes; tamén están moi apegados a outras tradicións, coma o lavar vasos, xerras e bandexas). Por iso os fariseos e maillos escribas preguntáronlle:

- Por que os teus discípulos non se portan conforme a tradición dos devanceiros, senón que comen con mans impuras?

El contestoulles:

- ¡Que ben profetizou Isaías de vós, hipócritas, como está escrito:

Este pobo hónrame cos labios,

pero o seu corazón está lonxe de min.

Danme un culto inútil,

porque a doutrina que ensinan

non son máis que costumes humanos.

Rexeitades os mandados de Deus e agarrádesvos ás tradicións dos homes.

E convocando á xente, dicíalles:

- Escoitádeme todos e procurade entender. Nada do que hai fóra do home pode manchalo ao entrar nel; pero o que sae do home, iso si que o mancha. Porque de dentro, do corazón do home, xorden os malos pensamentos, os roubos, os asasinatos, os adulterios, as cobizas, as maldades, os fraudes, os desenfrees, as envexas, as blasfemias, a soberbia, os desatinos. Todos eses males saen de dentro e manchan o home.